


洋学文庫  
文庫 8  
D 288  
3





中西紀事卷之六

粵東要撫

二十年冬欽差大臣大學士琦善至粵尋奉

旨署兩廣總督義律自天津赴浙亦由浙回粵以相國撫議已定請

撤沿海防衛許之時洋艘皆泊虎門外虎門為入省河之咽喉水師

提督駐焉其在外之礮臺凡二曰沙角曰大角皆有防兵自十九年

燒烟之後益增戍守凡官設之師船火船下至漁舟蛋戶快蟹扒龍

悉排列口門內外至是裁減官艘酌留其三之一而招募之航工水

勇散遣殆盡矣義律乘舟來往省會首索烟價繼又求給香港馬頭

行文照會且趣相國回文以昭憑信相國以事關割地遷延不覆義

江上蹇突

39- 7726

010190620005



律見兵勇漸撤虎門空虛數遣人挑戰相國亟傳諭止之義律曰戰而後商未爲晚也十二月十五日英人糾約漢奸乘坐多船直逼虎門外之沙角礮臺三江副將陳連升督兵拒之初以地雷扛礮擊斃西兵四百餘人援兵不至英人並力攻之遂奪礮臺陳連升及其子陳舉鵬千總張清鶴皆力戰死焉英人進攻大角礮臺守臺之千總黎志安受傷將礮位推落水中潰圍而出遂并奪大角悉取水中礮位分兵戍守於時虎門危急水師提督關天培守靖遠礮臺總兵李廷鈺守威遠礮臺遣弁告急於相國請增兵以固省城之門戶而相國仍執撫議不許提鎮固請乃密遣兵二百名乘夜暗渡不令義律知也義律挾兵以要相國照覆之文因前此有戰後再商之語乃仍以索烟價香港爲詞行文照會水師提督並脅以三日內回覆之限

相國據以奏聞其略曰該洋人不候回文輒行攻擊迨兩礮臺奪破後提臣請將該洋人前次來文從權照覆藉以作緩兵之計庶可量爲布置等因函致前來伏思此間水師兵械技藝廢弛已久經該洋人猖獗之後益形氣餒爲今之計總須設法先行止住洋船俾得並力籌辦而該洋人前日來文本有戰後再商之說臣以該洋人續有所請其來文接收與否反屬兩難若如該提臣所稱將前日來文從權照覆而今次情形已與前日不同該洋人旣不候照覆此間更不值覆伊前日之文惟思該洋人前日具報之書總應聽候回文何以輒先滋擾不若借此作爲詰問之詞觀其是何意見再行登覆庶以後該洋人續有來文係其稟覆文書旣於

國體無傷或仍可設法羈縻甫經備文去後復准提臣函稱十六日

辰刻即破兩礮臺之次日將虜我官兵何一魁釋放交其隨帶致該提臣文書一件經提臣簽復發去隨又一書列明請求各款聲稱聽候於三日內照覆等語隨代提臣具覆將文稿寄交繕發告以業經行文諮詢俟其登覆再辦現尙未據回報等因是時相國意在緩兵仍執撫議羈縻之迨兩礮臺奪破之奏至

上已簡授親臣宿將一意進勦義律亦偵知大兵將至所請不行踰年而粵東之釁復起

二十一年正月相國與義律相見於蓮花城定香港之約也初英人挾兵要撫數行文照會索香港甚力相國慮虎門失事佯許之而未敢入奏義律度香港未可驟得續請獻出沙角大角礮臺並遣人赴浙繳還定海以易之又趣相國回覆相國乃以出查礮位與義律訂

期見焉義律凡兩見相國出其所定貿易章程及給予香港全島如澳門故事相國皆許之義律又請蓋用關防相國不可但傳言屬其安靜守候一面咨會伊相收復定海省釋英俘一面據其照會來文附摺陳奏時

上方授奕山爲靖逆將軍隆文楊芳爲參贊大臣飭卽馳赴粵中剿辦適相國奏至大怒奉上諭覽奏曷勝憤懣不料琦善怯懦無能一至於此該洋人兩次在浙江粵東肆逆攻占縣城礮臺傷我鎮將大員荼毒生民驚擾郡邑大逆不道覆載難容無論繳還定海獻出礮臺之語不足深信卽使真能退地亦只復我疆土其被戕之官兵罹害之民人切齒同仇神人共憤若不痛加剿洗何以伸天討而示國威奕山隆文兼程前進

迅即馳赴廣東整我兵旅殲茲醜類務將首從各犯通洋漢奸檻送京師盡法處治至琦善身膺重寄不能聲明大義拒絕要求竟甘受其欺侮已出情理之外且屢奉諭旨不准收受西書膽敢附摺呈遞代爲懇求是何居心且據稱同城之將軍都統巡撫學政及司道府縣均經會商何以摺內阿精阿怡良等並未會銜所奏顯有不實琦善着革去大學士拔去花翎仍交部嚴加議處欽此是時義律自以香港業經相國說明允給遂於該處擅出僞示曉諭居民指香港爲英之屬埠又行文照會大鵬營副將令其將內地營汛撤回副將照抄來文由提督咨會到粵粵撫怡良據以奏聞其略言自琦善到粵以後如何辦理未經知會到臣忽聞外間傳說義律已在香港出有僞示逼令該處民人歸順彼國等語方謂傳聞未確盡惑人心隨據

水師提督臣轉據副將抄僞示移咨前來臣不勝駭異惟大西洋自前明寄居香山縣屬之澳門相沿已久均歸中國之同知縣丞管轄而議者猶以爲非計今該洋人竟敢將

天朝士民占踞全島該處去虎門甚近片帆可到沿海各州縣勢必刻刻防閑且此後內地犯法之徒必以此爲藏納之藪是地方旣因之不靖而法律亦有所不行更恐犬羊之性反覆無常一有要求不遂之時必仍以非禮相向雖欲追悔從前其何可及伏思

聖慮周詳無遠不照何待臣鯁鯁過計但臣忽聞海疆要地外人公然主掌並敢以

天朝百姓稱爲英國之民臣實不勝憤恨第一切駕馭機宜臣無從悉其顛末惟於上年十二月二十八日欽奉

諭旨調集兵丁預備進勦並令琦善同林則徐鄧廷楨妥爲辦理均經宣示臣等晤見時亦悉心稟請添募兵勇以壯聲威固守虎門礮臺防堵入省要隘今英人窺伺多端實有措手莫及之勢現既見有西文僞示不敢緘默謹照錄以聞奉

上諭香港地方緊要前經琦善奏明如或給予必至屯兵聚糧建臺設礮久之覬覦廣東流弊不可勝言旋又奏請准其在廣東通商並給予香港泊舟寄住前後自相矛盾已出情理之外况此時並未奉旨允行何以該督卽令其公然占踞怡良所奏覽之曷勝憤恨朕君臨天下尺土一民莫非國家所有琦善擅予香港擅准通商瞻敢乞朕格外恩施且伊被人恐嚇奏報粵省情形妄稱地理無要可扼軍器無利可恃兵力不堅民情不固摘舉數端危言要挾更不知是何

肺腑如此辜恩誤國實屬喪盡天良琦善著卽革職拿問家產卽行查抄入官欽此維時將軍參贊已在途次連奉

廷寄令兼程赴粵而琦相仍以定海收復撫事可成遂續奏陳香港地勢及現在籌辦情形

上恐該將軍等到粵復踵權宜請撫之故轍當將琦善前後摺奏及兩次

硃批給交將軍等看復奉

廷寄言英人種種不法殊堪髮指前有旨令楊芳先行赴粵會防並令奕山等兼程前進計已接奉遵行該將軍等到粵後務卽會集各路官兵一意進剿不可存一通商之見稍涉游移更不可因有繳還定海之事少加寬縱又密飭將軍訪查當日琦善與義律屢次晤面

談論香港之事彼時有無官員在旁該洋人與琦善有無私相餽送之事逐一查明據實具奏等因當琦相上年之赴粵也 陛辭出都沿途諏訪通習西語之人行至山東有東省濰縣知縣招子庸者廣東人述有同鄉鮑鵬在署素通西語遂由東撫推轂挈之至粵鮑鵬以前年在粵充西館買辦與義律相識又以販烟土賺重利經粵督查辦私梟入之訪拿案內鵬懼罪潛逃山東迨隨相國入粵數與義律往還所有請給香港退還定海之事皆鮑鵬居間來往作說客而相國以事關通洋特秘之中外藉藉語寢聞於上及二角之役

上決意主剿見相國始終欲爲義律乞恩以此益疑之而相國果以英人聞大兵將集意圖先事滋擾入奏遂有虎門之師

二月初六日英人乘舟闖入虎門靖遠礮臺陷水師提督關天培死之時靖遠將軍奉

命赴粵尙在江西途次而參贊果勇侯楊芳自固原提督任所先行甫入粵界

上以該逆有先事滋擾之信由六百里字寄將軍等並將琦善原奏抄給閱看謂該逆退出定海勢必將在浙兵船歸併粵洋恃衆負隅儘力抗拒若我師兵力單弱遽行進剿恐有疎失方有旨飭令粵省廣州將軍巡撫等暫時協力防守以俟大兵之集詎義律偵知謀爲先發之制遂於是日駛駕火輪兵船直入虎門口內關天培督兵守護靖遠礮臺開礮擊中洋舟一有頃英人以大幫連檣而進我營軍士衆寡不敵紛紛潰散提督中鎗自刎遂陷焉時威遠橫檔等處礮

臺聞警自潰總兵李廷鈺副將劉大忠皆敗走英師乘勝長驅直泊  
烏涌湖南鎮軍總兵祥福拒戰不克與其麾下二將赴敵死之烏涌  
去省六十里會城震動是月十二日果勇侯楊芳到粵其時各路官  
兵尚未齊集而虎門內外之舟師悉被英人燒毀礮臺既失礮亦隨  
之果勇議以堵爲剿值二十四日英人將以舟師闖入省河經鳳皇  
岡官兵擊退不意長潮之際南風大起英人又添派兵船杉板共三  
十餘艘乘風擁至迭被官兵轟擊逆船恃其堅厚且行且拒冒死深  
入飛礮火箭並力注攻果勇懼蹈虎門覆轍復議羈縻而彌利堅請  
欸之舟適至彌利堅者舊制通商之國來粵之貨船也以十九年秋  
冬間停泊澳洋正查驗進口而停止英人貿易之令下於是外洋各  
國應遵舊例駛赴黃埔開關卸貨者悉被英師攔阻不能進口迭奉  
上諭所有恭順之各國均准照常貿易值英人犯順各國仍阻遏外  
洋不得入自虎門之役英師攻破烏涌卡座洋舟直達黃埔因而向  
准通商之彌利堅佛郎西及港脚等國貨船隨後進口欲援例呈請  
開艙適鳳皇岡之役官兵相持英人狡逞於是彌利堅領事赴督稟  
訴呈請進口開艙兼爲英人緩頰大意謂該洋人旣經繳還定海不  
敢更有他求惟貿易一事係  
天朝二百年來稠疊恩施不得不代懇法外施仁仍循舊制呈出義  
律所立筆據有不討別情惟求恩准照常貿易如帶違禁之貨卽將  
船貨入官字樣又言英國貿易之洋人實未隨同滋事若貨船入口  
正可藉以制服師船等語果勇見省城危急亦欲藉此以作緩兵之  
計遂與粵撫聯銜奏請奉



嚴旨切責而義律果不受撫遂有窺省之役

四月英人以舟師橫亘省河謀攻粵也初琦相被逮

上赫然震怒趣令進兵而果勇侯楊芳時以勳臣宿將首先入粵義律爲之稍斂續因彌利堅呈請通商據情代奏而義律索烟價香港之吠聲復作粵東省河自烏涌以內其迤東之要隘曰獵德曰二沙尾西南之要隘曰大黃灣皆有礮臺分兵駐守琦相聞英人將入虎門層層撥撤意在專守省城而英兵已堵塞其上下游之路消息不通時靖逆及叅贊隆文皆已抵粵聞計於林制使制使請先遣洋商設法羈縻俾各洋船暫退稍遠仍將獵德大黃灣等處密運巨石雇齊人夫乘夜填塞一面調撥重兵兩岸防守仍於岸上多備沙袋以爲礮臺之需然是時各隘口兵勇已撤所有前備之木椿石塊悉被

英人陸續起去復以杉板小船往來游奕牽制多端大府計無所施惟嚴重閉之令而英舟已銜尾抵城下矣初一日英人駛入火輪兵船先泊城外十三洋行河南官兵出而禦之殺傷皆相當我水師之被轟擊者損其三艘初二日英人調撥火輪船二分襲省西之泥城泥城者佛山鎮之要路北門之管寄焉協將岱昌與戴非留營之劉大忠守之聞礮聲倉皇遠遁官兵皆望風而靡遂燒我師船六十餘號又乘勝回劫十三洋行修通怨也初三日英人分股登岸水陸交攻防兵皆潰焚毀城外民房火光燭天初五日英人攻四方礮臺臺據省城之後山俯瞰全城城中兇懼時有閩中新募之水勇初到入城督撫飛檄救援將軍阿精阿以省城緊要遣員持令箭截回四方礮臺遂陷焉維時軍民皆閉於城中不得出外援既絕英人距堙而

攻之每夜輒以火箭火彈穿射城中軍民重足於是廣州府知府余葆純復請議撫而義律志在索烟價一千二百萬大府有難色越日礮子直穿入老城貢院前將軍以下皆懼乃遣余葆純出城見義律許以烟價之半時彌利堅商人有在城外者居間排解議遂定余葆純請令英船退出虎門外而義律要以俟賂款清後將軍叅贊撤兵退出城外然後起程粵中官吏有從旁而怒髮決眦者然卒無以難也省中以初八日解嚴越二日英人始退出四方礮臺靖逆慮傷國體乃捏稱初八日焚擊痛剿大挫其鋒續奏稱義律窮蹙乞撫求准照舊通商並出具永不售賣鴉片烟土甘結將所付六百萬作爲追交商欠完案其六百萬之款由粵海及藩運兩庫給之仍以十五日將軍及隆叅贊退駐會城外六十里之小金山英人乃陸續駛舟出虎門外是役也

上見外情恭順姑准在該省通商而粵東節次焚剿之奏不過爲在事員弁虛級冒功張本

上亦知之不復深詰也

方撫事之定也粵東士民以大府無謀官兵示怯一時謗議沸騰適英人以賂故撤去四方礮臺之兵肆掠於城外初十日將入佛山鎮取路泥城過蕭關三元里里人因其淫掠起憤譁然爭逐之於是一時鳴金揭竿而起者聯絡一百有三鄉不戒而集頃刻間男婦數千人圍之數重義律預焉時洋衆不過千餘冒死抵拒被村衆擊斃兵目二人洋黨二百餘人義律遣人突圍而出走告太守太守慮敗撫議亟出城排解之鄉民漸漸解散義律乃得遁回舟中是時將軍叅

贊尙在省城兵勇未撤烟價未交有以爲事機之可乘者而余葆純乘夜徑出大府相率爲掩耳盜鈴之計傳聞當日余守出城彈壓實奉大府密諭並有文札可憑後因粵民交訴欲自行呈揭大府止之迨該守告病歸仍加道銜蓋大府以此慰藉之也王廉訪信中謂其私自出城或諱言之抑其時廉訪實不知耳豈有城外八聲鼎沸而大府如木偶者今以爲於是粵中清議尤集矢於太守遂糾集一百三鄉之紳士耆老賺血誓師語侵當事並以余葆純私放義律爲通洋賣國之尤而太守自是不容於粵矣當上年林制使查辦烟案時余方在南雄州任內調至省實相與左右之至是以附和琦相不復自顧其矛盾遂奉命數與義律往還談論烟價香港之事及將軍叅贊既至更爲張大其腐鼠之嚇撫事已定卒以重賂完城靖逆爲入之焚剿案內以旌其伐故粵東成敗之局夫已氏實始終之云

按撫事之局

成廟偶中於琦相先入之言不能無動迨舉事一不效輒幡然中悔授鉞誓師轉圜未爲不速而其究也元戎逼脅於垂堂老將因循於拱墓於是粵東要撫之勢成而邊陲割地之議起矣當英人垂涎澳門不可得乃役志於香港琦相亦知香港旣給必至屯兵聚糧建臺設礮流弊不可勝言一旦爲義律要挾不能自持故其前後奏詞率多支離掩飾而與義律往返晤商事機秘密即據其刑部說供亦恐多不實不盡之處今按相國被逮在刑部供稱至粵後該洋人來討貿易馬頭商議未定即攻擊大角沙角礮臺琦善因救急無策佯允代奏給與香港地方寄居該洋人意在挾制即在彼假出僞示支搭帳房十二月內該洋人欲交定海當即函致伊里布屬其帶兵前往收復並有該洋人給與留浙頭目信函附

入封內由驛遞往本年正月初五日琦善赴虎門查勘師子洋面洋藥義律求見以定海繳還欲求通商呈出所議章程數條多係貿易瑣務琦善以其多有窒礙當加指駁其時首府並將弁及洋商等均在該處伺候惟鮑鵬通曉西語是以令其傳話十九日琦善復往虎門查看礮位至蛇頭灣地方義律又來求見懇給予香港全島並擬寄居貿易各條款求爲蓋用關防琦善未經允許二十八日該洋人聞大兵將至勢必攻剿時思蠢動琦善見虎門危急著鮑鵬給與文書一件內稱如欲香港全島屬其安靜守候俟奏明後方可定議並面諭鮑鵬如洋情不順即將文書帶回鮑鵬見其情形凶惡未曾付給遂有二月初六日之事等語此其在粵查辦洋務之顛末也惟虎門不肯添兵坐令失事是相國一重疑案據粵東抄傳少穆制使信函謂十五日打仗之後義律卻用文書與提督前寄靜老三信限三日內回復否則再攻靜老連趕數信與義律屬不令人知而英人聲稱要事事全依方能歇手關李專弁請兵僅許密發二百名其差官來轅哭訴據云砲鎮兩位在礮臺相向而泣旣無援兵安得不坐以待斃云云然則二角旣失以後虎門未失之前此中曲折情形豈非所謂知而使之爲不仁不知而使之爲不知持此以轉詰琦相恐亦無詞以解也至於義律兩次見面仍是要求入奏及關防照覆之文而索香港一節則當相國入粵之初已稱情而許之矣開門揖盜百喙奚辭聚鐵爲山一錯難鑄何義律之智而琦相之愚也若夫城下之盟其失計在於彌人請款果勇入粵遂爲義律之奸計所乘一誤再誤可勝

言哉

以上所記二角虎門之役多據邸抄叅以琦相供詞之合者又核之粵撫叅奏及將軍叅贊在途次所奉前後

上諭

廷寄更證以裕帥咨會蘇撫之文粵東抄傳林制使之信義律稱兵要撫之本末略具於此至英人窺省粵中議和則靖逆原奏無一徵實語惟王廉訪信函得自目擊顏制使所奏多係確探今悉本之並附錄其原文於左以資異日史志家之考證焉

附錄王廉訪廷蘭致閩中曾方伯望顏信

再啓者粵省此番用兵所調各省之兵萬有七千不可謂不多各庫銀欸數百萬餉不可謂不足木料買自廣西火藥鎗礮解自江

西安徽軍裝器械不可謂不備而卒至決裂潰敗一至於此實由當事既鮮有章程用兵復漫無紀律有筆墨之所不能言而又有所不敢言者此邦乃足下桑梓之地自必望信甚殷特就當日實在情形有不可解之事四有可惜之事機二有可爲痛哭者三爲足下陳之廣東設礮臺以來大角沙角虎門三連橫檣烏涌獵德二沙尾以及省河各處皆爲要隘古人相度地利棋布星列一氣聯絡實今人所不能及洋船之初至省河也固漢奸所引進實因我無備使然琦相來粵先存一不敢戰之心畏之如虎使早爲未雨綢繆斷不至此賊破虎門烏涌急撤獵德礮臺之兵賊至二沙尾急撤省河礮臺之兵以爲我不撤兵兵必爲彼所敗所以姑退收兵入城以爲講和地步不知省之有礮臺猶人家之有門戶也

賊到門而門不關可乎開門揖盜百喙難辭追臥榻之前已被賊人斃睡乃猶歸咎於始事之人此不可解者一也洋船之進內河其初並不知內地虛實用一二杉板小船載漢奸探水次第而入至我所載石沈船之處不見一將一兵以爲守禦故得將木椿碎石陸續上去放心前進此無人之境非如入無人之境也城守時有拿獲漢奸多名訊知彼處每日有漢奸十六人分四班進城偵探我處探事終日誑報自相恐嚇者居多故兵船撤退之時望見洋船有擱淺數日不能動者或用小船起撥或用火輪船牽曳使平日有一二能事者探得實情用快蟹艇載水勇向其擱淺之船四面圍遶用火焚之非易事與乃彼有用心探水之人而我無認真探者彼能用漢奸作內間而我從未聞有一洋人作外間者此不可解者二也更不可解者賊踞香港蓋帳棚百餘間出有僞示初一日引水探報所蓋帳棚忽拆去大半又據報洋衆紛紛上船凡洋船在獵德烏涌一帶二十餘隻火輪船數隻杉板船十餘隻云云弟早間行香時因於進見妄參末議以爲洋衆既由香港上船彼處現必空虛如能分兵一路暗襲其巢穴一面用重兵守泥城如省河打仗時可以出奇由花縣兜其後路縱未必全勝亦可牽制其師奈當事以書生之見無應者迨事敗之後羣歸咎於發令太早不知洋船已全數駛進虎門其意何在我不擊彼彼必擊我先發制人未爲不可特布置失當耳初一日打仗後洋船稍退以火輪船二直趨泥城泥城爲北門咽喉亦爲佛山要路此重地也先是橫檔失守有叅將劉大忠者兵敗而逃當事以殉難聞奉

旨賜卹嗣因其逃回始以受傷梟水得生爲解復派伊與某協岱昌同守此地岱昌從未身歷戎行一卑鄙无賴小人因係親信派充營伍日日以算口糧爭供應爲事因製辦火藥木料可以沾潤復資緣而往雇一小艇逍遙於其間距泥城水口僅里餘聞礮聲卽倉皇遁去至今未知作何區處又初五日賊逼礮臺兵將捲礮而走洋船揚帆至天字馬頭放空礮數聲亦皆遁去其實千把以上將官皆在城內不出是難以敢死大義責之兵丁也維時城門全閉五六月三日以來夜間賊用火箭火彈直打城中城外東西南三處火光燭天燒去民房千餘呼號之慘不堪言狀大帥有令官兵自城外逃回開門准進而城中百姓不准放出一人夫兵所以衛民今乃藉民以衛兵此不可解者四也義律在洋行十餘日省河中洋船杉板數隻而已不難擒也伊亦毫無準備有時義律乘轎買物往來於市塵間此時如遺敢死之士數十人擒之直囊中取物耳乃屢次進言於當路輒以現在講和未可輕動是可謂宋襄仁義之師矣此可惜者一也初十日賊退出四方礮臺將取路泥城三元里村衆因其淫掠憤極鳴鑼一時揭竿而起聯絡一百零三鄉男婦數千人圍之數重洋衆僅千餘冒死突圍而出共斃百餘人又斬兵目二人其餘受傷無數百姓雖有傷亡然人衆可恃愈擊愈多斯時我兵在城者萬餘齊參贊新到有生力軍五百名近在金山如其有令兩路齊出接應鄉民使其腹背受敵縱不克聚而殲旃當亦剿殺過半矣乃計不出此不知義律何時將余守請出屬其彈壓又不知何時余守私出城外爲英人解和彼百

姓安知大義不過因其輪姦一老婦人起衅雖人衆直烏合耳見官如此遂漸漸解散而洋衆乃得遁回舟中蓋英人自破虎門以來未有如此之受創者也事機之失至今扼腕夫英人滋事豈但漢奸引導實亦百姓使然蓋粵東自少翁查辦烟案以來禁與販杜走私未免操之過刻故兵怨之洋人怨之其私販之莠民亦怨之當積重之餘以爲絕我衣食之源也故當英人蠢動之時羣相附和此等蚩氓不畏王章何知國法反恐英人不勝鴉片不行則前轍不能復蹈而該洋人又四布流言以爲與官爲仇絕不向民加害於是奸民貪其利頑民受其愚雖督撫曉諭示以能擒逆人者賞有差數月以來絕无成效及至賊破四方礮臺復淫掠不堪始吾其奸操戈相向設使當時被圍不解遲之數日必有內應而

開門迎賊者食毛踐土乃良者少而莠者多此可爲痛哭者矣

國家承平日久民不知兵官不知兵即兵亦不自知其爲兵當粵中告警之時官兵無不引領而望以爲某處調兵數千某處調兵數百指日雲集似此小醜跳梁不難即日盪平恃以無恐乃衆兵未到以前只風聞路中有搶掠人財物者有歐傷差役者及到省兵不見將將不見兵紛擾喧呶全無紀律斯時心雖知其不可用而猶幸其不滋事也不料初五日後往往互鬥放手殺人教場中死尸不知凡幾城中逃難之百姓或指爲漢奸或劫其財帛內外洶洶幾至激變尤可異者初二日英兵槍奪十三洋行官兵雜入其中肩挑擔負遂有無數千百成羣竟行遁去者黠兵冊中從不聞清查一二及至沿途討要口糧竟有城外各處將逃兵數千重新



應付回省反以追逐洋鬼迷路爲詞當事者猶以衆兵追敵放賞  
試思追趕敵人理應向前豈有迷路反走者今日之兵如是則異  
日可知一省之兵如是則天下可知

國家養兵千日用兵一時興言及此能無痛哭乎某以輕材毫無遠  
識然要好之心未嘗不矢諸夢寐自到貴省於今四月乃竟有此  
際遇卽有時自盡其分所當爲並欲自效其力所能爲無如分淺  
言輕徒多掣肘提庫中之國帑惟有傷心豎城上之白旗能無指  
髮旣承乏於此地恐亦在衆人清議之中然實有不可活不得死  
不敢病不能走之苦納手捫心能毋痛哭以上數事皆係實情無  
一虛誑雖屬貴省劫運使然實亦

國家氣運所關所慮一蹶不振從此爲外邦所輕更恐無賴匪徒漸

生心於內地側身四望天下能當重任者更有幾人欲著武功惟  
有慎選大將縱有小衅未可輕調重兵足下在同譜中未知鄙見  
有當否又福建水勇初五日進城適洋人由陸路上四方礮臺之  
時督撫持令箭飭令出城應敵無如將軍不開城門將其攔回而  
礮臺從此不守亦一恨事

按廉訪是書閩督顏伯璽得而上之又照抄粵東民人誓詞二紙  
卽三元里事

洋人僞文五件一并呈奏因言粵東辦理洋務全局攸關  
洋人初無受撫之情何以言撫月內據廣東抄來洋人僞文僞示  
及該省督撫節次知照種種情形決非効命歸誠之象奕山隆文  
已於四月十五日移駐離城六十里之小金山楊芳尙在城內齊  
慎亦已入城納賄之後無復亡羊補牢之計若謂賊以銀蠹而去

必不再來苟且於目前又思彌縫於異日計亦左矣又言楊芳前於江西途次按奉叅贊印信卽有以偏僻小港准該逆屯集貨物之語甫經到粵撫議又起是楊芳之與琦善其心思知慮固已如出一轍該二臣疊經

聖諭訓飭猶敢復萌故智奕山隆文閱歷未深猶可諉爲不諳軍務楊芳老於疆場事機坐失咎復奚辭廣東以虎門爲門戶虎門一失全勢已去琦善弛備撤防開門揖盜而礮位守門之具盡被擄去否亦戕毀楊芳初到並不據實陳奏仰求

聖恩寬以時日鑄礮造船訓兵練勇俟奕山隆文到日謀定而與之戰一味膽大粗疎至於饋事是時奕山若再扶同粉飾

君門萬里何以釋

主上南顧之慮查香港爲商船駛進內洋必由之路其島曰洪香爐

上有營汛居民並非偏僻小港可比旣被占踞不惟該洋船悉由其便卽我商船駛入內洋亦必遭其搜括聞已早露其漸我

朝統馭中外尺寸之土不可與人香港一島亦與定海何異卽使計日可復而烟船紛紛四出等於游魂此事終無了局啖虎狼以肉而欲止其搏噬必不能也又附片奏稱正在封摺間又據探報廣東四月十五日一摺已奉

諭允初八日勝戰並懇

恩旨等因接閱之下不勝駭異四月初八日廣東已傾敗罷戰安得復有勝戰卽初一日之戰亦只小勝旋即退散是所奏以痛剿乞撫欺瞞

天聽大膽昧良不料如此之甚臣實無任憂慮憤懣理合附片密陳等因然

上見洋情安帖方飭各路官兵調回歸伍而福建有新募之水勇八千亦以粵中就撫散遣殆盡不兩月而廈門失守以靖逆但以六百萬了粵東之局而不能禁其不犯閩浙是直以六百萬供其入閩入浙之資欲其無得隴而望蜀也豈可得哉

中西紀事卷之七

江上蹇叟

閩浙再犯

道光二十一年七月英人再犯浙以舟師取道過閩洋遂襲廈門陷之廈門當福建泉州之海口與泉永道治焉時顏伯燾任閩浙總督因粵東之役奏請移節入廈門增兵戍守撫事既成接據泉州及興化各澳洋面探報洋船游奕停泊或三四艘或八九艘無虛日方督修船礮預備出洋攻擊見粵東洋務附片奏中而英舟大幫已泊廈門外之鼓浪嶼口當上年之犯廈也為鄧制使新募之水勇所敗至是欲修前愆故聲言犯浙將以乘閩中之不備而攻之是月初九日英人駛駕火輪兵船入港制使調集水陸各兵禦於嶼口開礮擊沈其火輪船五

俄而英舟直撲口內礮臺舍舟登岸先犯陸軍陸軍潰金門鎮總兵江繼芸槍護礮臺不及被洋礮轟擊落水死延平副將凌志署淮口都司王世俊皆力戰殉焉是時我水師瞭西洋船大幫連檣內進皆游涌而逸興泉永道劉耀椿及廈門同知顧教忠皆先後走廈門遂陷制使收集潰兵退守同安英人方謀逞志於浙踞厦未久即全數駛出鼓浪嶼據謝蘭生思忠錄所記洋人在厦門肆掠有鄉民陳氏與之接仗洋衆五千我兵五百洋人用車礮民用擡槍以一擊十洋兵死者以百計傷者以千計陳氏之死者二人傷者十二人耳是以不敢久駐厦門而退屯鼓浪嶼也蓋洋人本欲犯浙又方受大傷是以全數退出耳八月制使督兵至厦門海口肅清商民復業遂以收復奏聞前自請嚴議奉

上諭洋人沿海滋擾厦門尤其垂涎之地該督駐紮半年之久不能先事預防以致倉卒失事本屬咎無可逭姑念洋人豕突而來弁勇奮力抵拒擊沈洋船六隻此時業已收回著從寬免其治罪仍交部嚴加議處欽此興泉永道劉耀椿係專防厦門大員因失守之後奔赴大營隨同大兵入厦收復制使以其功過相抵奏請革職留任上賞其罪亦許之是役也制使非無先事之備而為粵東撫事所誤遽將所募之水勇八千漫然遣散未暇擇其精銳撥補水師以及於敗然當其陳奏洋務力排撫局憤懣填膺方自任專閫討賊之權以作天下同仇之氣初不意甫櫻其鋒而固已情見勢屈暮氣乘之是則才弱敵强者也

上亦知受降非策擇將為難故於諸臣之功罪是非不欲顯為別白而制使以喪師辱國悒悒告歸踰年和議成而厦門竟不返矣八月英人再犯浙之定海當義律之繳還定海也伊相在浙接奉粵東咨會遣員收復奏聞奉

上諭伊里布不遵諭旨惟知順從琦善屢次奏報始以兵燬未集藉詞緩攻繼以接得繳還定海之札卽信以爲真已有旨令其折回本任命裕謙馳赴浙江作爲欽差大臣會同提督余步雲迅速剿辦欽此方制使接著兩江總督聞伊相在浙逗留不敢進兵心弗善也至是以欽差專任浙事上書主剿並以義律心懷叵測繳還定海之說恐售其欺請飭壽春鎮標官兵仍行前進奉

上諭所奏極是洋人攻踞定海之後姦淫搶掠荼毒生靈凡我士民志切同仇人思敵愾裕謙此次赴浙以順討逆以主逐客以衆擊寡必當一鼓作氣聚而殲旃朕佇望該大臣迅奏膚功懋膺上賞欽此維時定海鎮海等處尙有洋船四出游奕制帥遣兵節次焚剿並誅其官船之洋酋一人初英將踞定海虐使定民用法嚴酷殺人者先以刀割裂其皮納入水銀周身灌注遂活剝而懸焉制帥旣獲其酋令如其法誅之又洋人之死於定海者令軍民掘其尸而焚之通衢事寢聞於粵粵東撫事方定乃起報復之謠以圖犯浙然是時洋船方退出虎門靖逆將軍痛剿乞撫之奏至

上見英人恭順方飭制帥將寶山鎮海等處調防之官兵體察情形酌量裁撤而制帥接得粵中咨會以英人在粵聲言將移兵入浙報剝皮掘尸之恨現傳有新到之兵船火船一俟齊備卽赴浙江咨飭嚴防等因前來時值南風司令正海洋潮汐旺盛之時制帥方次嘉興乃奏請於六月二十九日統領前此奏帶來浙之江甯駐防八旗勁旅並徐州鎮標精兵五百名由嘉興起行前赴鎮海會同提臣余步雲撫臣劉韻珂體察情形相機籌辦又言該洋人以通商爲名而

通商有一定馬頭奕山等既爲籲懇

天恩自當籌及全局與之要約堅定爲一勞永逸之計斷無僅令其退出虎門仍復滋擾他省之理現既聞有赴浙之謠何以不向該洋人詰問明白轉行咨飭嚴防以致沿海各省譏傳不一風謠日甚不但各省調防之官兵未便請撤卽居民人等亦皆同仇敵愾舍其本業而荷戈以待實於

國計民生兩有關係應請

旨飭下靖逆將軍奕山等向該洋人嚴行詰問究竟是否誠心乞撫抑仍是得步進步之故智使各省有所遵循臣不勝翹悚待

命之至其時英人赴浙之謠雖傳播粵中而靖逆以撫事方定諱不上聞遂復奉

廷寄謂該洋人赴浙滋擾既屬風聞從何究其來歷且果別有思逞斷無先將傳播逗漏之理著裕謙仍遵前旨將江浙調防官兵酌量裁撤不必爲浮言所惑以致糜餉勞師等因由六百里諭知詎制帥甫抵鎮海而廈門告陷之疾置已聞於是飛檄定海總兵葛雲飛會同處州鎮總兵鄭國鴻安徽壽春鎮總兵王錫朋統各鎮兵五千前赴定海扼其內犯之路英人果于是月十二日濮鼎查郭士利等統帶大小火輪兵船二十九艘再犯定海初以四舟駛進竹山門被葛雲飛等開礮轟擊斷其船頭大桅旋即竄去十四日英兵由竹山嘴登岸鄭國鴻等督兵抵禦殺傷相當會連日陰雨轉戰泥淖中援兵不至士卒漸疲十七日英人分三路進攻以小舟渡兵登山撤舟死戰首陷曉峯嶺王錫朋中鎗死壽春鎮一營遂潰焉有頃竹山門潰

鄭國鴻死之時葛雲飛守近城以扼道頭街之市埠孤軍巷戰被敵人揮刀削其半面猶持矛手殺數人植立於崖石間而斃是役也三鎮血戰七晝夜連以扛銃扛礮前後殲西兵千餘又擒其二帥斬之傳言一帥者濮鼎查安突德也浙撫謂濮鼎查已死即指是役惟定海無險可守所憑者不過三面之山寇踰山而入勢遂不支兵不過五千備多而力分山高而守勞是其所以敗也三鎮陣亡

上謂其以四千殘師當二萬巨敵惋惜久之均飭部從優議卹惟署定海同知舒恭受者初以從三鎮殉難奏請

賜卹在案其後逃避入省浙撫以鳧水遇救代爲開脫並請隨營効力與粵東之劉大忠先後同揆矣

英人既破定海踞城數日統其得勝之舟師自蛟門島進攻鎮海時制帥駐師城內分派靈波提督余步雲守招寶山江蘇狼山鎮總兵謝朝恩守金雞山鎮海以笠山爲外障以招寶山爲內屏山之上有利威遠城前明所築以禦倭寇者制帥以余步雲爲宿將故以當關之責任之而別遣謝朝恩守金雞嶺與爲犄角初不意賊自山後來而提督之先潰也初定海告急制帥自東門城上瞭見提軍所守之招寶山上懸挂白旂心竊訝之乃擇日誓師於關帝天后之神與各營將士約毋得以退守爲詞離卻縣城一步亦毋得以保全民命爲詞收受洋人片紙如有不用命者明正典刑幽遭神殛刑牲醴酒示無轉念提軍微聞其事值誓師之日遂以腿疾辭不赴行禮制帥祭畢回營愀然不樂語其僚幕曰洋人戰則尙紅和則尙白予見提軍張白旂於山上故以誓師之舉覘其向背今其情可觀矣八月二

十六日英人舟泊鎮海制帥方後枹鼓厲士卒余步雲果詣城上請遣外委陳志剛赴洋船暫示羈縻制帥不許有頃英人舍舟登岸攻招寶山旋於山之後面以小舟載兵由石洞攀援而登官兵腹背受敵威遠城失守英人復分兵攻金雞山亦繞出山後兩路夾攻總兵謝朝恩拒戰不克被礮轟擊落水死兩山既陷督營官兵望風自潰維時制帥家人遙見賊自北門入制帥由東門奔赴學宮趨前護視中途遇一弁踉蹌號泣呼曰元帥投泮池殉難矣家人急至率潰勇梟水槍救以小轎扛護出城行至餘姚而卒時提軍已不知去向寧紹台道鹿澤長逃入慈谿詭稱入城河殉難昏迷之際被兵勇曳救以小舟護送入慈而鎮海之文武員弁皆棄城走惟縣丞李向陽死之寧波去鎮海六十里忽聞提軍回署一郡大驚又探報有外洋杉板船隻來至邵港探量水勢於是郡中自知府鄧廷彩以下皆覓小舟奔上虞而提軍亦單騎自南關出居民遷避一空二十九日英人以大小兵船八艘直泊郡城靈橋門下連開大礮虛無人聲因率兵衆舍舟登岸城門洞開遂不血刃而陷焉洋酋郭士利首先入城踞居府署出示安民始稍稍有至者惟甬東大郡半月之間三城連失而慈谿亦以敵氛逼近官民棄城不守浙撫聞變亟檄飭前任福建臬司鄭祖琛督兵畫曹娥江而守防紹實防省也裕帥之幕屬家人自餘姚舟次輿尸前進九月初一日自蕭山西興壩渡江浙撫劉韻珂迎入杭城始備棺衾殯於地藏菴越日歸其櫬於京師具其事以聞而諱言提臣擁兵不救之顛末厥後制帥之家人余升控於都察院奏聞



上飭逮余步雲入都寘之法裕帥死專旣雪奉

旨照陣亡例從優議卹

于謚靖節惟金雞嶺殉難之總兵謝朝恩求遺骸不得褒忠之典闕焉

四明之旣陷也浙撫告急於京師

上簡授奕經爲揚威將軍特依順文蔚爲參贊大臣又飭調陝甘兵二千赴浙進勦將軍以是年冬月抵蘇館於滄浪亭浙撫專任西路之防自江以東坐待大軍籌之帷幄立功反掌時有以專閩太遠爲言者而蘇門夙稱繁華都會供帳之隆聲色之悅將軍頗便之於是驛置偵探千里待報又多寄耳目於蘇浙最久之州縣以密謀制勝外人弗聞也時英人踞甯波又分兵守鎮海定海等處東至大洋聲

聲勢連絡浙撫畫江而守紹興東逼慈谿求援日急而將軍以兵力太單抵蘇之後復遣人赴淮徐聞招募山東江蘇義勇先後來營謀之三月未嘗一誓師而東有前任安徽泗州知州張應雲者請以計取之謂洋船自入內地以來率漢奸爲之嚮導故所過城邑如駕輕車而就熟路然不過陷之以利非有恩義之結足以令其効死今四明當水深火熱之時紳民靡不延頸望大兵早到而漢奸多其鄉人誠得若輩傳將軍令以重賞招撫之使其皆爲我用我兵攻城先期預伏城中內外相應此兵法所謂因間也將軍叅贊皆以爲然乃統兵自蘇起節行過杭州不少留踰年悉衆渡江而多魚漏師之變起矣二十二年正月大兵次紹興府時將軍叅贊議同日分襲甯波鎮海以牽制援應之賊知州張應雲先期與甯鎮紳士約令投洋之漢

奸分伏各處以爲大軍內應慈谿城邑已空洋人聞大兵將至悉退守寧波張應雲請刻日渡曹娥江先據慈谿以爲戰地將軍乃下令移營進發是月二十三日揚威親統大兵駐慈谿東門外即日分派總兵段永福以一軍直指寧波游擊劉天保以一軍直指鎮海叅贊文蔚統大營兵駐長谿嶺金華協副將朱貴統陝甘兵駐西門外之大寶山以爲中路聲援又飭張應雲率所募鄉勇一千五百人駐寧鎮交界之駱駝橋以爲南北兩軍策應

南謂寧波北謂鎮海

均約以是月之晦同時舉事俄而師期漏洩應募之漢奸有陰爲洋人作間諜者該洋人知之反令漢奸設計勾結駱駝橋之鄉勇倒戈相向一時南北兩軍見事急先期進勦遂以二十八日分襲甯波鎮海皆不克越日駱駝橋之鄉勇中夜自驚悉奔入大寶山副將朱貴方擬收集以圖進攻

而英人已爲先發之制遂合甯鎮兩路之兵長驅深入二月初四日英兵由小西壩登岸過夾田橋清道觀循慈谿東門繞過北門來攻大寶山朱貴麾兵首發扛銃自辰至未擊斃西兵數百人俄英人增兵自丈亭來由散板橋登岸襲大寶山之後路我軍前後受敵忽鄉勇隊伍亂反拒官兵或直逼於前或暗襲於後或橫衝其旁官兵不能支有頃各營帳房火起兵勇迷亂副將待長谿大營之援不至怒馬赴敵死焉時叅贊文蔚在嶺上聞敗方欲移營退守突於昏黑之際有漢奸數百人假充難民潰勇奔投大營官兵下山避之行未數里遙見嶺上火起所有營盤帳房悉被漢奸焚毀烟焰蔽天叅贊奔回曹江收集潰兵退保紹城揚威自東關聞變已先時率護從兵丁走是役也兩營挫衄喪其軍資器械殆盡西兵漢奸追奔數十里大

軍爲之奪氣將軍留叅贊守紹輕舟回省浙撫詢其致敗之由遂以大兵慈谿失利事勢危急入奏又條陳十可慮請操乾斷又附片奏請伊相來浙於是撫議復起先是二月十七日

上授耆英爲杭州將軍又

賞給伊里布七品銜隨同赴浙因劉韻珂之請也維時英人以慈谿之捷欲逞志於浙西而偵知省城尖山海口潮落沙淤舟行多窒遂思仍由海道以窺西路三月二十六日英帥忽退出寧波分撥大小船隻專守鎮海招寶山之要口其大隊火輪兵船悉由定海駛出大洋浙撫初遣人偵之不知其所往也將軍聞之遂以大兵收復寧波奏聞未幾洋船遊奕於江蘇之金山洋面吳淞戒嚴而英人謀進窺禾中以牽制江浙兩省遂轉入嘉興之乍浦乍浦濱於大洋爲兩省

之咽喉額設副都統一駐焉時杭嘉湖道宋國經亦督兵增守四月初七日有洋艘數號駛至乍浦洋面游奕水師不敢擊初九日復將大小船隻排列陣勢連檣而進又另以杉板小船十餘號每船十人二十人不等分泊西山嘴唐家灣等處官兵分禦衆寡不敵陝甘調防之兵死者三百餘人其駐防之兵分守天尊廟觀山灣一帶英兵開礮轟入口門我軍水師不利乃調旂兵專守駐防之內城初十日英人分股舍舟由燈光山等處登岸火箭齊發突有漢奸在內接應亦放火箭駐防兵亂凡力戰陣亡及被火死者二百餘人副都統長喜先在葫蘆灣禦敵受傷復回至鎮城城潰投水前鋒槍救送至嘉興越三十日卒其駐防左右營佐領防禦官陣亡者七人乍浦水師右營把總韓大榮守觀山力戰死知縣署乍浦同知韋逢甲率勇沿

塘防堵中礮傷左脇越日死其他駐防及本鎮士民婦女或被戕或赴水死者百餘人蓋變起倉卒遷避不及浙省自被兵以來民人塗炭未有酷於是役者也時杭州將軍及伊相奉

命先後來浙浙撫見勦辦不能得手又續奉相機籌辦之密諭遂與將軍謀趣伊相至乍浦設法退兵值副都統因傷開缺奉

旨授伊里布爲乍浦副都統英人踞乍數日揚言進攻嘉興伊相至仍遣家人張喜上洋船見郭士利告以撫事有成令其先將船隻駛赴大洋先是乍浦接仗我軍生擒洋人十六名械送嘉興獄中郭士利索之急伊相許候船退卽查明遣人護送至鎮海交還英人如約遂以乍浦收復奏聞禾中解嚴浙之東西稍稍休息然是役也英人本欲進窺蘇松撫事將定仍思挾兵以要之伊相遷延不圖速決浙

撫亦自顧門戶苟安目前未幾而入江之患起矣

按鎮海之地明人刻石於威遠城上以爲平倭第一關蓋浙省之咽喉而東南之一大門戶也定海之役三鎮血戰數日殲洋衆千餘以守則嚴以戰則力而浙東卒不能保魏默深言舟山一嶼以險則非門戶以富則非沃壤以大則僅彈丸明湯和經理沿海並未收入內地

原注明之定海卽今之鎮海康熙間始移定海於舟山而改舊衛名鎮海

順海八年議政王大

臣奏言舟山乃本朝棄地守亦無益其令副都統率駐防旗兵回京此皆開國老成瞻言百里故康熙以前皆棄化外蓋城偏海濱船抵城外礮及城內迥非臺灣崇明之比乃寧波瀕海連岸之南田山墾成沃壤者反禁不許開而以重兵守孤懸之島轉使外人得以挾制此地利之不得者計維棄定海而移其兵民於南田嚴

守寧波佯退鎮海招寶山以誘入之而後於甬江下游狹港塞其去路乘風火攻者爲上策專守鎮海不使入者爲中策分守定海則下策也然則三鎮以敢死之將而位置於必不可守之城豈非以隋侯之珠而彈千仞之鵠哉若使裕帥當日權其輕重奏請以定海爲外藩而羸帥以張之使其旣得定海必謀深入斯時以重兵守蛟門島而招寶金雞爲犄角之勢則此五千士卒之精銳三鎮同心之忠勇縱未必能制其死命而門庭堂奧之間亦可決然無虞且洋人亦未敢輕身試於不測之淵而自取其敗所謂未戰而得算多也昔人言明智審量彼己乃能預有所割棄惜裕帥當日未識以棄爲守徒令三鎮以有用之才寘之無用之地力竭捐漚而無裨於國事豈獨將將之難抑亦

### 國家用人之厄運也

裕帥初殉難時人言嘖嘖頗有異詞然其投入泮池昏迷救出行至餘姚舟中正命時洋人方以重賞購制帥尸遂兼程輿尸前進其渡江月日及杭城官吏視其殯斂具見浙撫原奏中至其誓師一事及余提督擁兵不救之顛末其家人控詞未之見也後得見欵程梓廷制使所撰節帥殉難紀略云得自節帥患難與共之記室敘述頗詳今多據之原文具後卷殉難記中自英人犯定海裕帥謂其犯兵家之忌者八上書主剿雖未免言過其實而一腔熱血報國拳拳至其身任欽差大臣予閱其前後章奏及來往咨會之文古誼忠肝勃然義形於色若夫用兵之成敗利鈍非可逆觀矧以今日沿承平之積習文弛武玩一旦禍幾猝發而欲責堙河於一掌倚支

廈于獨木雖知者亦知其難也

國家舊制提督隅坐有事屬橐鞬從制府取進止况以欽差大臣統屬文武而令不行於提臣觀其白旂預懸攜貳之情已見祭告稱疾跋扈之形已成律以軍法則穰苴之斬莊賈未為過當即不然亦當如魏絳之於揚干戮其麾下之一人以徇於軍中即諸將弁皆股栗自致於死地乃慮以鬪牆召衅不欲訟言輒愾不自得至於事之既償而自以其身殉之亦可哀已而論者謂其以剛取敗比之子玉趙括一輩不亦冤哉

慈谿漏師之本末据浙撫十可慮原奏前段語惟奏內不及朱剛戒殉難事蓋甫接探報未經確查復据吳侍郎鍾駿所撰朱剛戒廟碑增入之碑內所記與浙撫原奏悉符而浙撫奏內所稱城外

接仗失利者核其月日即指西門大寶山之戰也大寶山之創洋人足與舟山吳淞稱鼎峙蓋其時陝甘勁兵淮楚義旅皆摩厲以須奮欲一戰而副戎以忠義相激僇力同心若使將軍不募本地之鄉勇不貪三城之收復謀定而後戰則大寶山一營正兵法所謂疾趨戰地以待敵也洋人守寧鎮之不暇豈敢反攻况番性多疑見大兵逼處各有戒心亦可不攻而自退洋人以三月退寧波未必不因大寶山之一戰若堅守慈谿以圖進取其退必速是則將軍此舉本非得算之籌何況機事之洩哉至其誤用間諜招募敵人任用之漢奸作為內應反洩其謀以致三城不克兵勇轉多傷亡據其奏中稱將軍回省面述之詞必非有意羅織又言將軍等密籌數月一切布置區處悉從隱秘臣忝任封圻尚不能深悉遑問其他等語度彼時將軍在蘇計已先定函

知浙省又恐傳播漏洩是以概從隱秘似亦非浙撫諉過之詞惟浙撫所陳十可慮雖係實情然亦與琦相所稱地理無要可扼軍器無利可恃兵力不堅民情不固等語同一危言要挾故其附片奏請伊相來浙卽爲異日撫之張本推其用心見慈谿失利紹興危甚而省城一江之隔有實偏處此之虞故爲此以救眉睫之禍中丞於是爲不終矣

奕將軍之收復寧波據其原奏稱大兵進攻寧郡洋人畏逼竄退現在派員收復又續奏乘機暗襲鎮海情形極意鋪張蓋其時聞乍浦已定撫議欲襲靖逆在粵中痛剿乞撫之故智也今據浙撫收復原奏爲得其實原奏稱該逆之退或因寧郡已被搜括空虛無可留戀或恐兵勇暗襲潛殺不敢久留此語已是爲揚威留地步矣惟該逆並

未受創忽爾退出寧郡難保其不分竄他處冀圖一逞等因又稱該洋人於二十六日鼓樂前導而出城查揚威奏稱收復甯波卽在是日焉有大軍直薄城下而洋人仍復好整以暇鼓樂前導而出城者

上亦知將軍藉收復爲名以自掩其半年來一籌莫展之咎亦不復深詰也至其續奏焚燒鎮海洋船尤非盡信之書不足爲據又浙撫奏內言該洋人在寧郡向居民逼索浙省十一府志書及黃河揚子江地圖則當乍浦旣退焉有不防其潛入江蘇而但以退浙省地面爲計之得此與楊嗣昌之縱楚賊以入蜀者何異哉

附錄廖侍郎鴻荃參劾廈門道原奏

爲道員新升臬司請

旨申諭以釋羣疑事臣近讀

上諭四川按察使著劉耀椿補授欽此查劉耀椿山東進士現任福建興泉永道駐劄廈門上年廈門失守卽係伊任內之事旣不殉節又未黜謫已屬僥幸苟免茲復晉授臬司外議頗多臣愚亦不無駭異伏思我

皇上臨御二十餘年賞功罰罪一秉大公何獨於廈門失守之劉耀椿轉加

恩擢或其人才具甚屬難得略前愆而期後效如秦用孟明之意非他人所可比方抑或查明廈門失守全係顏伯燾一人之罪伊無須分任其咎亦祈

特旨明白宣示以釋羣疑否則該道員忝冒升階未愜衆望事件猶小誠恐統兵之將帥守土之官吏誤會

聖意謂失守廈門如劉耀椿者不特免罪更可升官將來更有何人爲

國家守城捍禦寇敵乎此其所關於

國事軍心者最巨臣於劉耀椿素無識認誠以洋務方殷賞罰勸懲爲行兵之首不得不披瀝愚忱冒昧密陳是否有當伏乞

皇上聖鑒謹奏

按此奏當奉

上諭劉耀椿上年失守廈門經該督奏請嚴加議處維時因閩浙兩省失守官員尙多未據奏到是以未經降旨懲辦所有福建浙江及江蘇三省失守城池各員著該督撫迅速查明參奏毋得再有



遲延遺漏劉耀椿既有應得處分自未便遞加升擢著以道員留於福建交怡良差遣委用仍著入於應議各案內一體核辦欽此查自廈門陷後英人擾浙省則定海之舒恭受鎮海之甯紹台道鹿澤長甯波之知府鄧廷彩均經浙撫奏請隨營効力迨該洋人入犯大江則江蘇各官吏無不紛紛效尤自侍郎奏後始將各省失守之文武員弁次第查辦然自余步雲外其餘概從末減重者僅予遣戍遂無不及於

寬政矣

中西紀事卷之八

江上蹇突

江上議款

道光二十二年夏五月英人以舟師犯江蘇寶山縣之吳淞口謀入江也時陳化成任松江提督督兵創英人於海塘之東兩江總督牛鑑掣援兵走吳淞遂陷軍門力戰死之初軍門自福建廈門改調松江於二十年夏蒞任提督駐劄松江甫六日而定海報至遂督本營兵馳赴吳淞口相度形勢建行營於海塘高岸上設帳房居其中寶山大令請入城不許又請築館於礮臺之左右亦不許是時伊相方奉

命爲欽差大臣裕帥以蘇撫攝兩江制篆聞有洋船遊奕寶山洋面

卽日馳驛前往至則被軍門轟擊遠竄矣隨具摺奏稱七月間有大洋船三隻在洋遊奕內有一艘闖入內洋經提臣陳化成督率弁兵開礮轟擊及其船尾該船旋即轉帆開放兩礮不能及我塘岸駛向東南深水大洋須臾不見蹤影因該洋船來去詭譎時已傍晚未經窮追洵屬老成持重之見又言提臣陳化成不避風雨寒熱住居白單布帳房與士卒同甘苦已將五月號令嚴明軍民恪遵紀律等因蓋以長城倚之也軍門自此專閩海口所夕旁皇未嘗離行營一步上年秋廈門舟山告警軍門以寶山東南爲吳淞黃浦兩江交匯入海之口實爲上海崇明管鑰於是激厲將士拊循軍民冬則踏雪巡營夏則海潮作時帳房水深尺許未嘗一移營就燥地躬習勞苦以爲士卒先本年四月乍浦失守江浙騷動軍門嚴爲之備飛咨制府

請益兵時牛督駐師上海有河南徐州江甯兵三千籐牌八百軍門益恃以無恐是月初六七等日有洋船火輪四由外洋一路探水而入牛督方自滬來見其連檣內進鎗礮相接其檣帆高出塘上文餘輪烟蔽天牛督驚疑束手軍門亟慰藉曰無恐外洋所恃不過鎗礮某經歷海洋五十年此身在礮彈中入死出生者數數矣今日火攻頗有把握願以身當之苟得挫其鋒援兵一鼓而進賊不足平也牛督意稍定初八日英舟排陣而入軍門麾令開礮首擊沉其火藥巨艦一又中其象鼻頭桅之兵船三共斃英兵三百餘人英兵勢卻繞出小沙背適牛督統兵來教場提營將士皆歡呼踊躍戰益奮須臾英舟自檣頭瞭見制府乘輿在教場後乃以飛礮注攻逐其左右隊而擊之徐州兵先潰河南叅將陳平川遂以籐牌八百擁制府回城

牛督亟棄冠靴雜軍校而走一卒坐乘輿易之英人遂由東礮臺登岸繞而西時守備章印福等守西礮臺力戰不克死之軍門見軍士無後援撫膺頓足歎曰垂成之功敗於一旦制使殺我矣遂中鉛子傷噴血死英兵乘勝入寶山牛督已自西門逸出有頃火起西礮臺存儲火藥悉被焚燒寶山遂陷英人入城查點各船轟斃之兵憤甚乃驅本地壯丁爲之搬運財物下船之後悉虜之以充營兵之數上海距寶山八十里聞變自監司以下皆覓舟遠遁商民遷徙城邑已空英師舟泊新閘登岸遮北門而入遂不戰而陷焉惟尤提軍勅統壽春鎮兵二千守松江英師方自上海進攻官兵併力抵禦放礮相持二日而退中流砥柱賴此一軍而一時論者獨惜吳淞之戰功虧一簣牛督掣提臣之肘而不知已自斷其右臂遂以釀京口白門之厲

階則其罪蓋浮於余步雲矣軍門之死有武進士劉國標者負其尸匿蘆葦中越十日嘉定大令練廷璜求得之遣人舁至嚶城殯於關帝廟嚶人爭詣哭奠繪遺像祀之事聞得旨賜諡忠愍

六月英人欲由海入江先自上海駕杉板小舟擾及無錫之邊界及江陰靖江等縣鄉民聚衆逐之不勝去遂自福山放洋游奕於圖山關外關爲由海入大江之口先期有鎮江紳士請於常鎮通海道周項以圖山江面陜隘一水中泓兩岸設防火攻足以及之周乃親詣圖山相度形勢紳士偕往爲指陳堵截守禦事宜需費數萬觀察周歷海口笑曰鋌而走險彼必不來來則俟其擱淺而圖之虜在吾殼中矣糜數萬金以設萬一之防誰其任之時當盛夏海洋潮汐旺盛

之時又值南風司令英舟揚帆乘潮而入是月十四日英人火輪兵船悉抵鎮江城外至則登岸滋擾參贊大臣齊慎湖北提督劉允孝督兵禦於城外見兵力不支退守距郡四十五里之新豐地方外援既斷英師踞堙攻城城中惟駐防一軍差完副都統海齡率以死守攻之二日不克英人乃以火箭射入城中延燒近城房屋火光燭天遂乘間架雲梯入城先開城門城中居民紛紛逃出乃以兵攻駐防殺旗民無算副都統圖戶自焚挈全家殉焉是役也官兵內外數千人不戰而潰常鎮道周頊及鎮江府知府祥麟丹徒縣知縣錢燕桂先後棄城走其駐防之民英人積恨無男婦少長皆屠之驅羣羊而攻猛虎其不格明矣京口既潰瓜儀一帶之鹽梟乘間劫掠洋艘來往游奕擊而焚其船居民望見烽火弗辨也僉以維揚居天下膏腴之地又當其下游順風揚帆半日可到淮之場運兩商尤岌岌抱垂堂之懼時有漢奸之諜者在揚謂可乘危以徼利也乃揚言英人戒師期將因糧於揚以規取江寧非速備贖城以求免者禍且旦夕至贖城者洋人挾兵索賂之口號也商人聞警將謀盡室行適有在揚城開張書畫館之江壽民者素善於淮商之門下客顏某請身至京口詞之諜者以告馬利遜呼之入索賂款六十萬江壽民請減其半馬方欲疾趨江寧意不在揚而獲儻來之利許之歸以告商人而淮商皆中落咄嗟無以辦具白於臬使但明倫但不可商人曰納賂以行成不猶愈於齎糧而藉寇乎但嗽暗無以應乃作爲商人提借之款飭總商具領事後歸償即日交顏某偕江壽民致送京口遂以紆禍迨白門撫議定後在於本年所付之六百萬內劃扣臬使商人浸

浸置身局外矣

是月之下旬英人濮鼎查馬利遜等自鎮江駛駕火輪兵船八十餘艘連檣上溯自觀音門至江甯北河外之下關傳烽舉火照徹城中時牛督方自上海回沿江告警一日數驚然不謀江上之守惟引領東望日遣人探欽使起居而耆帥方自浙西起節伊相初到大局未敢專也洋艘抵城下趨之急牛督飛書照會以欽差大臣已奉

諭旨永定和好不日即可到省七月初三日伊相遣家人張喜偕揚州商夥先詣英舟傳大府意羈縻之濮鼎查馬利遜謾語曰者將軍到未知何日若歸語欽差制府爲我治邸舍於城中入而徐議之可也答曰通好出自

密旨非百姓所得聞待者將軍至宣揚

上意曉示軍民則四海一家矣馬利遜曰我軍數萬遠來轉輸無及方謀就食於城中若必欲俟者將軍者速爲我辦餉糈三百萬二人者歸以告伊牛時新調壽春鎮兵已抵城外將弁陳平川等皆憤憤請決一戰牛曰虎鬚不可撩也曰然則請閉城登陴而守牛曰是令寇疑我時江甯京口將軍在座聞之拂衣而起南畿城守甚嚴重視京兆將軍錄鑰牡啓閉必以時制府遇有急事夜鑿傳呼必遣人告將軍索令箭然後得啓方洋船之泊下關也將軍亟傳令箭閉城城中洵懼時居民方戒京口焚燒之禍盡送其孥又遷新舊殯厝於郊外猝聞重閉之令漏限已促填塞城門有枕藉死及推棺而暴露者制府止之不可乃劾將軍將軍亦具疏劾制府然牛督惴惴恐誤撫局伊相來往調停約以已啓申閉迨見敵情叵測牛督殊無意戰守

怒而歸傳諭旗兵閉駐防之內城設紅彝礮於城上遙對制署居民益恐維時英人已將要求各款先行照會欵內一議索烟價商欠戰費銀二千一百萬一議准寄居貿易於廣州福州廈門寧波上海五港口一議英人之有職者與中國官員用平行禮其餘則劃抵關稅釋放漢奸等欵末請鈐用

國寶以昭誠信要三帥刻日畫諾初六日耆帥入城先按其所請各欵逐一照覆稍稍駁詰之英人不可又聞壽春鎮兵之至也謀先發以制之初八日戌刻洋舟突張紅旗旋分兵安設大礮於鍾山上山在城之東北俯瞰全城牛督初以議撫不謀扼險而守遂爲所踞揚言詰朝攻城牛督亟遣人止之初九日三帥遣侍衛咸齡江寧藩司黃恩彤甯紹台道鹿澤長同張喜等前詣下關洋船上告以所請各

款業已據情代表奏俟奉到

批回即可永定和約是日耆伊二帥由八百里驛置奏聞上覽而憤甚以其奏示樞臣是時滿首揆攬機務謂兵興三載餽餉勞師曾无尺寸之效勦之與撫功費正等而勞逸已殊靖難息民於計爲便上亦久厭兵而幾幸外洋之一悔禍也爰排廷臣之議而許之惟福州係省會之地

飭以泉州換給所請鈐用

國寶之處著易以該大臣等關防時三帥退兵之後將以修好先遣張喜等上船約以十五日相見於舟中馬利遜通曉漢語有傳其爲漢奸之仕於英者語來使曰我洋人不諳中國儀注必欽使制府之來也者請以本國平行禮相見蓋西人拜跪之儀惟施之於天主其

見國主則免冠屈一膝若平行來往惟舉手加額而已屆期三帥率侍衛司道等前詣英舟與濮鼎查等四人相見皆用西禮申訂盟約十七日各大吏復親詣下關具牛酒犒師濮馬等忽辭不見大吏回城亟遣張喜登舟問故馬利遜曰前定之款無可通融苟中悔者將執囊韃以周旋何以見爲蓋多魚之漏師也大府奉到批示懼撫事中沮秘不以聞仍奏乞

天恩俯如前請又稱鈐用

國乃其寶本國主所藉以覘向背從違者若不奉允准所議各條一概不行等語

上知三帥之危言要挾而度其不能戰也趣卽依議完案三帥果於覆奏之後堅訂前盟一一如其所請十九日三帥率同城文武前赴

儀鳳門外之靜海寺時濮鼎查乘坐綠呢大轎護從兵丁二百名整隊來寺相見會話將前議各款先後畫諾二十一日英將濮鼎查馬利遜等由旱西門進城至上江考棚答拜是日大吏傳集四營兵擺隊鼓吹升轎迎之入城馬利遜來往傳說議俟本年六百萬交款後

原議二千一百萬本年先付六百萬餘一千五百萬分作三年付給奉到

硃批鈐加

國寶卽全數駛出吳淞口外是役也三帥拱手受盟一詞莫贊而居閒作說客者張喜及商夥顏某預通消息黃恩彤鹿澤長因其介紹數至舟中以締三重臣之好兼爲億萬生靈請命舒恭受來省差後亦効奔走之役浙撫所謂折衝於口舌之間者也將軍德珠布者遇變無遠略獨倔強不附撫議與牛督有隙者伊再三緩頰始撤駐防

城上礮然將足跡不上洋船聞撫事成輒決背呼老牛而詈其首禍也白門事定黃恩彤升任粵撫麗澤長舒恭受本以失守論劾續經者相及浙撫先後保奏得從末減而張喜顏某者亦奏請賞給五品頂戴皆以預撫事有功云

按吳淞之役關係江上全局牛督擊援而走不知其開門揖盜之禍嗣至於兵臨城下俛首蒞盟遂為東南戎首陳軍門竭三年熱血盡瘁匪躬固已操勝而後戰之算不意乖其所遇乃與恇怯觀望之元帥共事以殺其身豈非天哉軍門既歿吳人謾表忠紀實以記其事其前段語悉與牛制使原奏相符後段則制使擊援而走自諱之也今所敘述自表忠紀實外叅以毛侍郎式郇所撰忠愍祭文及浙人所記忠愍遺事采入謝貳尹思忠錄中歸罪牛督衆口一詞然

則軍門之死其非戰之非明矣關軍門之死也琦相實殺之裕帥之死也余步雲實殺之陳軍門之死也牛督實殺之觀於三忠殉難之本末則千載而下必有援曲端武穆之律以成定讞者其亦可為長歎也已

### 京口之役

上飭查明副都統遇害情形蓋其時常鎮道周頊棄城而走聞副都統之死懼于

嚴譴乃訐以誤殺良民被民殘害等情嗣奉

旨交者相查明城陷之日該副都統力竭自經實非被人戕害更尋獲其尸並一妻一孫於灰燼中又拾得都統印信及所著袍襟並其妻玉環確據取具合營及紳士切結入奏周以稟訐不實與城



陷未經殉難各員一體議罪京口士民以其愎諫殃民又欲陷忠良於死後羅百姓於非辜乃編爲十字謠揭之通衢周漸憤而去人言之可畏如此

白門之撫英人挾兵以要之牛督危言以脅之予閱其奏詞言形勢萬分危急呼吸卽成事端旣鋪張鍾山架礮之事又言事若不成就卽遣人前挖高家堰道聽之語不知傳自何人而任意指稱以效腐鼠之嚇牛督之罪上通於天矣者伊初到預存一不敢戰之心而先入之言方寸已亂開門之揖借一無謀雖欲不撫烏可得哉夫浙撫之薦伊相此爲請撫之張本伊相退乍浦之兵是時者相方在杭州將軍任內業已奉

密旨相機籌辦何以不在浙省了此一局致有畫蛇添足之後圖是

浙省詭以甘言而蘇人受其實禍甚矣牛之戇不如劉之黠也當洋船泊下關時伊相張喜俱已到省牛第閉城而守必有從旁而解紛者旣不能誓師討賊視其力之所能爲則當袖手充耳姑聽命於發蹤指示之人毋令天下後世以我爲首難不亦可乎怖牀非勇越俎非知受辱於英人而屈身於厮儈其亦可已而不已乎聞撫事旣定英人但請者伊列銜而牛督不預焉嗚呼此毛遂與楚王定從呼十九人於堂下曰公等碌碌所謂因人成事者也牛督本因者伊以成事正宜置身局外何至一朝聞變不勝其齷齪而亟亟焉欲攘臂於其間欲以紆禍不恤人言牛督其戇矣哉

附記白門邗上遺事

壬寅款議旣定濮鼎查馬利遜入江寧省城大府宴於城北上江

考棚馬利遜者英人專司文案之官名如漢人叅軍長史之類其人給辯多智謀濮以武臣統屬兵將而折衝樽俎馬利遜實左右之方飲酒正酣馬利遜告三帥言我兵來時本不敢遽入內江輕造重地緣先期遣人探水由沿江一帶上溯安徽至蕪湖爲止共先後探過七次每遇險處停舟泊岸周行廬葦間不見一兵一將然後放心前進若和議不成長江天塹固將一決勝負也此當日文武員弁所共聞者並聞者相舉以告人謂馬利遜如何識得長江天塹之語是則井蛙之見也白門人傳撫議定自馬利遜一人之手而馬利遜之見於檔案者凡三嘉慶二十一年副羅爾美行道光二十五年副濮鼎查行皆書其官名非前後一人也

據臺灣紅番供稱是年來中國之馬利遜其名贊臣疑卽此人

西人有撰馬禮遜傳者是爲嘉

慶二十年來中國之副使其名曰羅伯得幼入書院習耶穌教弱冠遊粵中習中土語言文字歸爲英之繙譯官二十一年隨正使至京師以不習拜跪禮辭歸箸華英字典又購中國書萬卷儲於英之倫敦書院庫中道光十四年卒此西士之彬彬爾雅者又據庚子辛丑間澳門月報言馬利遜自云只略識中國之字若深識其文義卽爲甚遠近日英人刊行之書有馬利遜所著外國史略紀五口通商以後事甚詳疑卽道光年間來中國者其言略識中國之字自是謙詞歐羅巴風會日開又兼中國不得志之儒生藉通番以餽口其識得長江天塹之語固无足怪也惟牛督當日亟規規措撫事不謀江上之守洋船數萬里入中土每到口門輒先遣漢奸駕小舟入內河測量水勢或卽雇當地漁船爲之嚮導中

國不備不虞是以敵人覘其虛實易而侮之觀馬利遜云云正王廉訪所謂直入無人之境非如入無人之境者是年安徽巡撫程楸采聞寇至鎮江督兵堵蕪湖鑄鐵鎖橫東西二梁報銷十萬兩議撫之後棄置江干遂爲廢鐵昔人謂以人力設險而不以人力守之無益也今洋人探水七次無過而問焉者鐵鎖鐵椎何益於事哉

方洋人之至下關也江寧黃方伯恩彤令城內行保甲之法凡居民鋪戶對門五十家立一棚給以牌冊晝啓夕閉以防城內奸民乘亂劫掠白門人初甚德之然其出示安民則稱洋人爲乞撫而來非求戰也自張喜通撫事消息後方伯親詣下關與濮馬等訂盟來往日益密有傳其一日在城外洋船上夜飲一宿未歸初英

人以舟師至又分股由陸路擾及句容鄉鎮嗣聞城中議撫戢兵以待其時漢奸方充斥於城內外而英人自以其言語衣服與中國異附郭之十里內不敢輕身出游居民亦微聞撫事成弗備也迨英人自上江考棚宴歸意侈體泰游覽湖上及聚寶門外之報恩寺觀者如堵數日後有洋人在南門外目其婦女之白皙者執手調謔居民憤憤糾土人猝而歐之受傷者歸舟訴於其酋酋怒趣衆將執戈赴門方伯聞之急登舟往謝而酋必欲得主者按問方伯乃謀於兩首尹以翌日枷鎖軍犯數名充毆者詣洋船謝罪事始寢旋出示曉諭軍民謂外洋重女輕男執手是其本俗爾居民慎勿驚疑致滋事端等語江寧人傳爲口實當二十年餘姚人獲洋婦得其所繪彼國朝儀圖國中大臣進謁女主皆屈一膝以

手執女主之手而嗅之此卽方伯重女執手之所本云時又有鹿澤長舒恭受者係浙省失守之員劉中丞力爲開脫又推轂於耆相帶至江甯遂同與撫事之局蓋二員自論劾後隨營効力因委赴海疆偵探軍務遂數數與洋酋馬郭等往來故白門之議雖方伯在外主持而鹿舒二人陰左右之浙撫前奏該二員爲洋人所推服後又奏稱該道等隨同措置折衝於口舌之間亦復著有微勞等語一時清議所及以爲污穢剋章欺瞞

天聽不亦輕朝廷而羞當世哉

當三帥詣洋船相見其時侍從之文武員弁多係四營中人歸述其事言三帥登舟濮馬等皆回避有西官引至舟中高樓上拜謁英國主像畢然後與英使用平行禮相見大吏唯唯如命而諱述

其事又以爲樓上所供卽天主像者不能具悉也又傳聞議欵旣成洋船尙未起碇值是年八月初十日爲

宣宗萬壽之辰英人築壇於下關之靜海寺外屆期洋酋皆北向呼嵩叩祝則以爲君臣之禮固當伸其易地之敬矣惟彼國人自言非入廟見天主不跪而所繪朝儀圖傳寫流布予親見之乃知其屈一膝者卽其見君父師長崇敬之禮佛經言須菩提偏袒右肩右膝著地合掌恭敬今之中印度爲古佛國此卽西人屈一膝之所自來今旗人請安亦屈一膝漢人效之凡屬吏見長官皆以此示崇敬是則中外之禮大略相同而其舉手加額亦與漢人之拱手推手相似也

揚人納賂之事江壽民因之以爲利但都轉貪之以爲功而微幸

於十年之前厲梗於十年之後觀咸豐三年粵匪之禍豈造物之有意弄人耶何其人其事之不約而同也但以詞科清望出視鹺務曾在兩淮署中取聊齋志異親加評點以爲此感應因緣足以勸善懲惡者是則干戈擾攘之秋侈談果報抑亦坐不闕堂之長者戎服講經之元帥歟江壽民以保護維揚有德色出入於官商靡寓中公私秘密皆得預聞三年賊陷鎮江有奸細入揚城偵探江識其人遂欲效前事以賂止之適但都轉助防在揚與現任都轉劉良駒同畫守禦之策二十二年之事但以身在局中謂江壽民瞻略過人淮南商亦信任之於是兩都轉意見相合悉聽紳商區處而相率爲掩耳盜鈴之舉迨江至京口革人欣然受賂告以此行志在北上沿淮溯河勢不能越邗溝而飛渡也乃約以過境不

入令官員暫避城外事過之日猶得以守城退敵論功於是自運使以下皆出城江壽民自謂得計以其身質於敵營中賊抵鈔關託以入城覘視帶領數百人分住城內各廟宇秋毫無犯江壽民徧告居民安堵无恐時

上方飭漕運總督楊殿邦督兵駐守揚城紮營在外江壽民見城中敵人日益充斥方欲詰其敢約而賊聞續到之官兵反責江壽民預通消息欲以空城計陷入重圍遂鞭壽民貫其耳驅之登城以退官兵江自以賣城之罪百喙難辭因乘間自盡賊乃下重閉之令樹幟負嵎振臂一呼羣兵蠢起維揚之民方抱虎熟睡而不之覺蓋聚而殲者過半矣夫重賂以求免此所謂救亡之不暇其辱已甚而乘危徼利之市傭輒思僥幸於再試乃以一郡人委之釜

中凡上而身亦隨之是則僂江壽民之尸而寸磔焉曾不足以比  
死者之一灑而合城自都轉以下方信其墓拱尸居之嚙語冀以  
支撐傾厦解救垂堂信乎一之已甚矣但以二十二年之役商人  
德之故其罷黜後仍來往淮上迨粵匪東下奏請隨營効力卒以  
此蹈前車之覆轍而身當其禍致令他日過邗上談往事者輒以  
但江二人爲始終成敗之關鍵有識者惜其身任專圻而失身於

市井也

歸去來文卷之四  
清江人魏某與某商賈自來往淮上各商字號甚多其  
劫掠不遺出劫武糧自謂其利甚厚其利甚厚其利甚厚  
人合官軍營總辦於軍營之內其利甚厚其利甚厚其利甚厚

